

Faulo ena leta me Efeso 'idia

Leta ana alamani weaqina

Faulo ena leta ba'e 'wayavia, mana nuanuana me Efeso ina alamani aqiaqiea vonigo nawale Yaubada 'iva'ava'ata qabudi mahalaya be wese bwa'obwa'oya naluve'aidegedi, ta Keliso tauna kuyavata qabuna adi ludebana. Ta wese Faulo nuanuana navematamagilafuyedi be ina veilivu aqiaqi 'idewani Yaubada lova tomtau venua'ivinedi ina toatoa, ta ba'e yani~nana na'ifoqe 'eguma ina ve'aidega Keliso maega. Nugweta Faulo ena simana ve'aidega weaqina 'inaya vonedi ma'oda Yaubada Tamada ena tomtauyavo venua'ivina 'aiqedi, ta wese ma'oda edi luveifayavo nuataqo 'aiqedi be wese ma'oda 'etoyavua ni'a iloba 'aiqi Natuna Iesu Keliso 'inega. Ta wese ba'e leta~nana 'inega Faulo me Efeso ve'itedi Yaubada ena vona fofofola adi aqiaqi na'ifoqe Niboana Gwalagwalana 'inega. Ta wese vona sesebai 'inega nuanuana nave'itedi 'ekalesia Keliso maega ive'aidega, 'inega vonedi vonigo 'ekalesia kavona 'wafi taha, ta Keliso tauna toludebana. Ta wese 'ekalesia kavona vanue ta Keliso tauna ana 'oqola. Ta wese 'ekalesia kavona taha vavine ta moqanena Keliso. Ba'e yani diavona kana 'ita aqiaqiedi Keliso ena veyoluba be, ena guba be, ena nuataqo be, ena nuakolokolo, ta wese ena tunutunuqa 'idiega. Ta wese Faulo ve'iteda ma'oda 'inega ada avia Seitani kana vewaiwai va'inea.

Leta gamona

1:1-2 Vematamagilafu be lukaiwa
1:3-3:21 Keliso ta ena 'ekalesia
4:1-6:9 Toa vauvauna Keliso 'inega
6:10-20 Yaubada ena 'ebevedavi adi vefewa
6:21-24 Vona 'ebel'uova ta venoqi

Lukaiwa

1 ^{1a} Leta ba'e ya'a Faulo 'iguyega omi'a Yaubada ena tomtauyavo 'abaga Efeso 'inaya otoatoa. Ya'a Yaubada ena nuanua 'inega

^a 1:1 Via 18:19-21; 19:1

yavetovaletuyana ada To'etoyavua Ieisu weaqina.

²Nuanuagu omi'a Yaubada Tamada be eda Kaiwabu Ieisu Keliso edi nuakolokolo be wese edi nuadaumwala na'eno'eno 'imia.

'Etoyavua Keliso 'inega

^{3b} Egwavo, Yaubada kana awatuboya, tauna eda Kaiwabu Ieisu Keliso Tamana. Tauna vona veyolubeda ta yani qabuna aqiaqina Niboanina Gwalagwalana 'inega neida mahalega, mana ita'a Keliso maega. ^{4c} Lova Yaubada maduvenua'ivineda Keliso 'inega, ta 'abiboda bwa'obwa'o be yani qabuna 'iva'ava'aidi. 'Inega ita'a vonigo gwalagwalada ta gebu ada 'ebeve'ewamo 'iawanaya. ^{5d} Yaubada ena veyolubega maduvenua'ivineda sabi 'awanatuneda Ieisu Keliso 'inega, mana lova 'inega ena nuanua 'idewani, ta ba'e yani~nana weaqina qaiawa gegoyo.

⁶'Inega Yaubada kana awatuboya ena nuakolokolo qidwana weaqina, ta ba'e nuakolokolo~nana nei kavovoda, mana ita'a Natu Otaqina maega. ^{7-8e} Ta Natuna sulalinega gubaufeda eda luveifayavo 'idiega ta nuataqoda, mana tauna ena nuakolokolo qidua va'inena neida, ge ana fata be kana 'etolivei. Ta yani ba'e viaqia ena alamani qidua va'inena 'inega, mana ni'au alamani aqiaqiea toyani ada luaqiaqi. ^{9f} Ta Yaubada ena nuanua 'wai'waivina lova 'inega ni'au lu'ifoqeyea 'idaya. Ena nuanua aqiaqina ba'e 'idewani, ta yani qabuna Ieisu Keliso 'inega viaqia. ^{10g} Ta ena nuanua~nana ana alamani ba'e 'idewani: Tuta~nana Yaubada ena nuanua 'wai'waivina nalu'ovoia 'inega ena 'iva'ava'ata qabudi mahalaya be bwa'obwa'oya Ieisu Keliso ena luvine waiwaina 'inega nava'auqidi 'aideganaya.

^{11h} Ita'a Ieisu Keliso maega ni'a kave'aidega mana kavetumaqanea. Ta ba'e 'inega Yaubada 'awa'awa natuneda, mana lova maduvenua'ivineda ena nuanua 'idewani. Ta ba'itaga ena nuanua ana 'ebel'u'ovoia ni'a 'ifoqe, mana tauna ena nuanua nugwenugweina ge ana fata nanogei. ¹²Ena nuanua ba'e mana ita'a kadamulu'ita vane Keliso 'inaya be kavetumaqanea, 'inega luaqiaqieda be Yaubada Tamada simasimatala otaqina kana awatuboya.

¹³Ta wese omi'a Vale Aqiaqina ami 'etoyavua weaqina Keliso 'inega ni'au onoqolia. Ta tuta~nana ovetumaqanea 'inega Yaubada Niboanina Gwalagwalana neimi, tauna ami 'ebe'inana. ¹⁴ⁱ Ba'e 'ebe'ina~nana 'inega kana alamania ada ve'ia nawale mahalaya Yaubada 'inega kana 'ewea lova ena vona fofofola 'idewana. Ta wese ba'e 'inega kana alamania ita'a Yaubada ena tomotauyavo ni'au gubaufeda. 'Inega wese ba'e weaqina Yaubada ena aqiaqi otaqa kana awatuboya.

^b 1:3 Efe 2:6 ^c 1:4 Ion 15:16 ^d 1:5 Ion 1:12 ^e 1:7-8 Efe 2:7; Kol 1:14 ^f 1:9 Lom 16:25
^g 1:10 Kol 1:16,20 ^h 1:11 Lom 8:28-29 ⁱ 1:14 2Kol 1:22

Faulo ena noqi

15-16 Lova yanoqolia omi'a emi vetumaqana eda Kaiwabu Ieisu 'inaya weaqina, ta wese emi veyoluba Yaubada ena tomotauyavo weaqidi. Ta omo'e tuta~nana 'inega be ana laba ba'itagana ge wese eda lua'u venoqi weaqimi. Ta egu venoqi~nana 'inaya tuta qabuna yalulukaiwa weaqimi. ^{17j} Ta yavevenoqi Yaubada eda Kaiwabu Ieisu Keliso Tamana simasimalatina 'inaya be Niboanina naneimi 'inega nuami nagiq'a'uya, be yaqisa tauna ona alamani aqiaqiea. ¹⁸ Ta wese yavevenoqi weaqimi be nuami na'eqa'ui be yaqisa yani qabuna aqiaqidi Yaubada ni'a 'iva'ava'aia weaqimi ona alamani aqiaqiea. Ta ge ona venuana magilafu yani diavona weaqina, mana ena gaba 'imia 'inega ni'a 'awanatunemi. Ta wese yavevenoqi ena veyoluba qiduana ona alamania, mana veyoluba~nana vona fofofolea ena tomotauyavo 'idia. ^{19k} Ta wese yavevenoqi weaqimi be yaqisa Yaubada ena waiwai otaqa ita'a ana tovetumaqanayavo weaqida ona alamani aqiaqiea. Ba'e waiwai~nana 'inega Yaubada ^{20l} Keliso 'aligega giveya'itoto 'eviviea, ta mahalaya ena 'ebetoea neia 'ataqinaya. ^{21m} Ba'e 'inega Yaubada luvine be waiwai Keliso neia, be tauna Tamana ena tovale'ewayavo be, Seitani ena tovale'ewayavo be, niboana qabudi be, taudi adi wawa 'ena'ena'idi, ta wese yani qabuna vetoluvine va'inedi ba'itagana ta wese tuta maimai 'idia. ²²ⁿ Vonahaqiaqi, Yaubada luvine be waiwai Keliso neia, 'inega yani qabudi luviluvinedi, ta wese venua'ivine be tauna 'ekalesia ana toludebana. ^{23o} Ta 'ekalesia taudi Keliso du'unavo. Ta 'ekalesia yawaina qabuna Keliso 'inega 'ewea, mana tauna yani qabuna yawaidi adi Tonei.

Ieisu Keliso 'inega kayawaha 'evivi

2 ^{1p} Lova omi'a kavona 'ali'aligimi emi luveifayavo 'idiega, mana Yaubada ge oda matayagea. ^{2q} Vonahaqiaqi, lova bwa'obwa'o ana ilivu luveifana oviaviaqidi, mana omi'a taha toluvine omatayagea, ta tauna bwa'obwa'o be mahala nuaninaya ana toluvine. Ta niboanina fewafewa Yaubada ana tonoga giwalidia 'inega ge nuanuadi Yaubada ina matayagei. ^{3r} Tomotau qabuda lova wese 'idewani taudi, ta tuta qabuna 'wafi ena ilivu luveifana ka'abi'abibodea. Ta taudega tola'ai eda nuanua e 'inega wese kaviaviaqidi. 'Inega luaqiaqieda be Yaubada ena diavilavila kada lobe, mana ita'a luveluveifada 'idewani totoa bwa'obwa'o qabudi.

^{4-5s} 'Inega kavona taudega kada luve'aligida eda luveifayavo 'idiega. Ta tuta~nana Yaubada Ieisu giveya'itoto 'eviviea e 'inega ita'a wese

^j 1:17 Kol 1:9 ^k 1:19 Kol 1:11 ^l 1:20 Same 110:1; 2Kol 13:4; Kol 2:12 ^m 1:21 Kol 1:16; 2:10 ⁿ 1:22 Same 8:6 ^o 1:23 Efe 4:10; Lom 12:5; Kol 1:18 ^p 2:1-5 Kol 1:21; 2:13
^q 2:2 Kol 3:7; Tai 3:3 ^r 2:3 Kol 3:6 ^s 2:4-5 Lom 6:11-13

giveyawaha 'evivieda ena nuakolokolo 'inega, ta wese ena veyoluba qiduana 'inega. Omo'e 'inega ba'itagana ita'a Keliso maega, mana Yaubada ena nuakolokolo qiduana 'inega 'etoyavuida. ⁶ Vona aqiaqi, lova niboanida 'ali'aligidi, ta ba'itagana mayawaidi, mana Yaubada giveya'itoto 'evivieda Keliso maega. Ta ena viaqa ba'e 'inega ni'a vetoeda mahalaya Natuna di'wenaya, mana ita'a Keliso Ieisu maega. ⁷ Inega tuta maimai 'inaya ena nuakolokolo qidua va'inena nave'itayea tuta~nana 'etoyavua kana lobeia Keliso Ieisu 'inega. ⁸ Mana ena nuakolokolo 'inega ni'au 'etoyavui mi emi vetumaqana 'inega. Ta gebu taumiega emi viaqa 'idiega, ta 'esi Yaubada ena nei kavovo 'inega. ⁹ Inega ge taha toga taunega ana fata nagivaneyei navonaya, "Ya'a taugu egu viaqayavo 'idiega 'etoyavua ni'au yalobeia." ¹⁰ Vonahaqiaqi, ba'itagana toa aqiaqi otaqina tawa kalobeia Yaubada ena viaqa 'inega, mana Keliso Ieisu 'inega give'evaunida be 'iva'ava'aida fewa aqiaqidi sabi viaqidi, mana lova ena nuanua madua'uya 'idewani.

Ieisu Keliso 'inega kaveqabu 'aidega

¹¹ Ta ge ona nuafania vonigo lova omi'a ge me Diu emi vi'oi 'inega otoasi'i me Diu edi qabu 'idiega. Taudi nimadiege natudiavo me'ome'olotodi 'wafidi iluluda'ea. Ba'e ilivu~nana 'inega taudiege igivaneyedi, ta omi'a ivegilemi mana 'wafimi ge ana luda'amo. ¹² Ta omo'e tuta diavona 'idia Keliso 'inega otoasi'i, be omi'a kavona wagawaga 'idewani, 'inega ge oda toa Yaubada ena tomotau vevenua'ivinidi edi qabu gamonaya. Ta wese Yaubada ena luvine be wese ena vona fofofola Buki Nugwenugweina gamonaya 'idiega otoa luluvai. 'Inega ge taha yani weaqina oda lu'ita vane, ta wese emi toa bwa'obwa'o ba'e 'inaya Yaubada ge oda alamania. ¹³ Vona aqiaqi, lova Yaubada 'inega otoa luluvai, ta ba'itagana Ieisu Keliso sulalinega ni'au miemi di'wenaya. ¹⁴ Keliso tauna eda 'ebenuadaumwala, ta ima'a me Diu ta omi'a ge me Diu ve'aidegeda. Lova kavona taha 'ali vetoasi'ieda, ta ba'itagana Keliso taunega 'ali~nana qeunia. ¹⁵ Mosese ena luvine 'inega vebibina ta wese vona waiwaina 'eala 'eno'eno, ta Keliso ena 'aliga 'inega ba'e yani diavona luveawalidi, ta 'esi nuanuana qabu magilafuda naluve'aidegeda tauna 'inega. Ta ba'e 'inega toadaumwala miea 'idaya. ¹⁶ Ta wese eda veqabu 'aidega 'inega Ieisu mieda Yaubada 'inaya be tauna maega kaveiaiana 'evivi. Ta ena 'aliga 'etoluia 'inega eda vetoatoasi'i luveawalia. ¹⁷ Inega Ieisu mai ta tomeqabu itoa luluvai Yaubada 'inega lugaihidi toadaumwala weaqina, ta wese tomeqabu Yaubada di'wenaya itoatoa ba'e toadaumwala~nana

⁶ 2:6 Kol 2:12 ⁷ 2:9 1Kol 1:29-31; 2Tim 1:9 ⁸ 2:10 Tai 2:14 ⁹ 2:12 Kol 1:21; Lom 9:4

¹⁰ 2:13 Kol 1:20 ¹¹ 2:14 1Kol 12:13 ¹² 2:15 Kol 2:14 ¹³ 2:16 Kol 1:20,22 ¹⁴ 2:17 Ais 57:19; Sek 9:10

weaqina lugaihidi. ¹⁸ Ta Ieisu ena viaqa 'inega qabuda me Diu ta wese ge me Diu ada fata kana veiaiana Tamada maega Niboanina 'aidegana 'inega.

¹⁹ ^c 'Inegana omi'a ge me Diu ba'itagana ge wagawagami, mana ni'a oveiaiana Yaubada ena tomotauyavo maega, ta oveqabu 'aidega ena gade 'inaya. ²⁰ ^d Ita'a Yaubada ena vanue, ta vanue~nana ana avutugu ena tovaletuyanayavo be wese ena tovesimasimanayavo. Ta Ieisu Keliso tauna vanue~nana ana 'oqola waiwaina. ²¹ ^e Ta ita'a tovetumaqana kavona vanue ana yoanayavo, ta Keliso yoana diavona 'etubwetubwedi, ta ena fewa 'inega Vanue Gwalagwalana yoqonia Kaiwabu weaqina. ²² ^f Ta omi'a ge me Diu wese emi vetumaqana 'inega Ieisu tawa tubwemi kavona vanue 'idewani, ta vanue~nana 'inaya Yaubada Niboanina ni'au ve'abaga toatoa.

Faulo ena fewa taudi ge me Diu 'idia

3 ¹ ^g Ya'a Faulo egu lugaihi omi'a ge me Diu 'imia weaqina ia'uluguyegu vanue 'ebeyoqona 'inaya yatoatoa.

² ^h Ta yahalamani aqiaqiea valegu ni'a onoqolia ya'a Yaubada ena nuakolokolo 'inega agu veyoveyoea ba'e neigu be ena viaqia ami iula weaqina. ³ ⁱ Ta ni'au yavonemi leta ba'e ana 'ebeve'ale 'inaya ma'oda 'inega Yaubada taunega ena nuanua 'wai'waivina lu'ifoqeyea 'iguya. ⁴ Ta 'eguma ba'e leta~nana ona avo 'ovoia, e 'inega ana fata nuami na'eqa'uuya ya'a egu alamani Yaubada ena nuanua Keliso weaqina. ⁵ Lova lagata nugwenugweidi Yaubada ena nuanua 'wai'waivina ge dasimana 'ifoqeyei 'idia. Ta ba'itagana Niboana Gwalagwalana 'inega give'ifoqeyea ena tovesimasimanayavo be wese ena tovaletuyanayavo gwalagwaladi 'idia. ⁶ ^j Ta Yaubada ena nuanua 'wai'waivina ana alamani ba'e 'idewani: Vale Aqiaqina ana vetumaqana 'inega omi'a ge me Diu ana fata be Yaubada ena veyoluba naneimi 'idewani ima'a me Diu ni'a alobelobea. Lova ita'a weawealida kavona qabu magilafuna, ta ba'itagana ni'au kaveqabu 'aidega. 'Inega Yaubada ena vona fofofola Ieisu Keliso 'inega ita'a qabuda weaqida.

⁷ ^k Yaubada ena nuakolokoloyega be wese ena waiwaiega egu fewa aqiaqi otaqina neigu, 'inega ena nuenuega Vale Aqiaqina yasimasimana dadanea. ⁸ ^l Ta ona nuaia, ya'a ge daluaqiaqiegu be to'ekalesia qabudi gamodiega Yaubada danuakolokoloyegu. Ta tua, ena nuanua 'idewani, 'inega ba'e fewa~nana neigu. E 'inega omi'a ge me Diu Vale Aqiaqina yalulugaihiea 'imia be yaqisa Yaubada ena kaikaiwabu ge ena awalamo

^c 2:19 Efe 3:6 ^d 2:20 1Kol 3:11 ^e 2:21 1Kol 3:16 ^f 2:22 1Fit 2:5 ^g 3:1 Fil 1:7,13

^h 3:2 Kol 1:25 ⁱ 3:3 Efe 1:9-10; Kol 1:26 ^j 3:6 Efe 2:13,16-19 ^k 3:7 Kol 1:25

^l 3:8 1Kol 15:9-10

ona 'ita lobe a Keliso 'inega. ⁹Inega Yaubada venua'ivinegu be ena nuanua 'wai'waivina tuta 'ebeve'ale 'inega ena givesimatalia tomotau koyadi 'idia, tauna yani qabudi adi Toviaqa. ¹⁰Ta Yaubada nuanuana ena 'ekalesia 'inega ena alamani qidua va'inena nave'itayea bwa'obwa'o be mahala nuanina ana toluvineavo be wese ana tovewaiwaiavo 'idia. ¹¹Ba'e Yaubada ena nuanua tuta 'ebeve'ale 'unu 'inega, ta ba'itagana eda Kaiwabu Ieisu Keliso 'inega ni'au give'ifoqeyea. ^{12^m} Ta Keliso 'inega ada fata me eda giwalifatu kana 'ifoqe Yaubada 'iawanaya. Ba'e yani~nana ana fata mana Keliso kavetumaqanea. 'Inega ge kana venuana magilafu eda 'ifoqe matanaya weaqina, ta 'esi me ena qaiawa na'atumieda. ¹³'Inega yavevenoqiemi ge ona nuavita egu toa vitana weaqina, mana vita~nana 'inega yani aqiaqi otaqina ona lobe a.

Faulo ena venoqi to'ekalesia weaqidi

¹⁴Ta tuta~nana Yaubada ena alamani qiduana be wese ena nuanua aqiaqi otaqina weaqina yanuanua, e 'inega yasobadi ta yavevenoqi Tamagu 'iawanaya, ¹⁵mana tauna 'inega gade qabudi mahalaya ta wese bwa'obwa'oya itoatoa. ¹⁶Ta yanoqinoqiea tauna ena waiwai qidua otaqina ge ena awalamo Niboanina Gwalagwalana 'inega nagivewaiwaiemi emi nuanua 'inaya, ^{17ⁿ} be yaqisa Keliso nave'abaga giwalimia emi vetumaqanega. Ta wese yavevenoqi weaqimi Yaubada ena veyoluba 'imia natabo, ¹⁸⁻¹⁹'inega omi'a be to'ekalesiayavo qabudi maega waiwai ona 'ewea Yaubada 'inega be yaqisa Keliso ena veyoluba ona alamani aqiaqiea ana baba be, ena kue be, ena vane be wese ena webui. Vonahaqiaqi, Keliso ena veyoluba ge taha toga ana fata ana 'etoliva dahalamania, ta yavevenoqi weaqimi veyoluba~nana ona lutonovia, 'inega Yaubada ena waiwai otaqa be ena ilivu aqiaqi otaqidi naluveagatuna'imi.

²⁰Vonahaqiaqi, Yaubada kana awatuboya! Mana ena waiwai 'eno'eno 'idaya, ta waiwai~nana 'inega ana fata yani qabuna naviaqidi weaqida. 'Eguma ita'a me eda venuana magilafu kavevenoqi 'inaya vaina yani weaqidi, e ba'e yani diavona wese ana fata. ²¹Ta wese yavevenoqi Yaubada awatubo qiduana nalobe a ita'a to'ekalesia qabuda 'idega, ta wese Keliso Ieisu ena viaqayavo 'idaya 'idiega. Ta awatubo~nana na'eno vataya lagata be lagata 'idia. Vonahaqiaqi, eda nuanua 'idewani.

Keliso 'inega kave'aidega

4 ^{1°} Ya'a yoqoyoqonigu yatoatoa Vale Aqiaqina ana lugaihi weaqina. Vona aqiaqi, Yaubada ana luaqiaqi be awatubo nalobe a 'idega, 'inegana yavevenoqiemi emi ilivu ona 'itamaki aqiaqiedi, mana ami gaba ge damai taha tomotau kavokavovo 'inega, ta 'esi Yaubada gabemi ta

^m 3:12 Lom 5:2; Ibe 10:19-20 ⁿ 3:17 Ion 14:23; Kol 1:23; 2:7 [°] 4:1 Kol 1:10

venua'ivinemi ena tomotauyavo 'idewani. 'Inega ge taha toga nave'ewemi emi ilivu weaqina, mana tuta qabuna emi ilivu tunutunuqina. ^{2p} Me emi nuawebui ta me emi ilivu nuvana ona toatoa. Ta wese tomotau ge ona nogedi tuta~nana luveifana iviaviaqia 'imia, ta 'esi veyolubega ona bibitaqomi. ^{3q} Ta tuta qabuna Niboana Gwalagwalana 'inega ona ve'aidega, ta toadaumwala 'inega taumiega ma emiavo ona luvetuba. ⁴Ita'a to'ekalesia ni'au kave'wafi 'aidega, ta qabuda Niboana Gwalagwalana 'aidega~nana ka'ewea. 'Idewani wese yani 'aidegana weaqina me eda vetumaqana kalulu'ita vane, ta ba'e yani~nana weaqina Yaubada gabeda. ⁵Ta eda Kaiwabu ana 'aidega otaqa, ta eda vetumaqana 'aigedana ta wese eda babitaiso 'aidegana. ^{6r} Ta wese Yaubada Tamada ana 'aidega otaqa, be tauna ada Toluvine, ta ena fewa viaviaqidi 'idega, ta wese ita'a tomotau qabuda Yaubada maega katoatoa Niboanina 'inega.

^{7s} Ita'a tovetumaqana qabuda Keliso waiwai neida fewa taha taha weaqina, ta tauna ena nuanua 'inega wila'a taha taha vewila'ayea to'ekalesia 'aidega 'aidega 'idaya. ^{8t} Ba'e weaqina Buki Nugwenugweina vonaya,

“Tuta~nana vaneqa debanaya
 'inega voalanavo yoqoyoqonidi
 'ebe'ewedi tauyedi,
 ta ena tomotauyavo
 wila'a taha taha neidi.”

^{9u} Ta Buki~nana ena vona “vaneqa debanaya” tola'ai ana alamani? E ana alamani ba'e: Keliso nugweta webui mai bwa'obwa'o gamo otaqinaya.

¹⁰ Ta towebui~nana wese vane mahala deba otaqinaya, be yaqisa tauna Yaubada ena 'iva'ava'ata qabudi naluvinedi di'we qabuna 'idia.

^{11v} Ta Keliso 'ekalesia ana tomotauyavo 'idiega venua'ivinidi be vaina ivetovaletuyana, ta vaina ivetosimana, ta vaina Vale Aqiaqina iyawala dadanea, ta vaina ivemesinale ta wese vaina ivetove'ita. ¹²Ba'e tofewa diavona Keliso veyoedi be Yaubada ena tomotauyavo ina 'iva'ava'aidi ena fewa weaqina, be yaqisa Keliso 'wafina taudi 'ekalesia ina tabo waiwai. ^{13w} Ta edi fewa ba'ena ge nalua'u ana laba to'ekalesia qabuda vetumaqana 'aidegana 'inaya kana ve'aidega, ta wese edi fewa ge nalua'u ana laba eda alamani nave'aidega Yaubada Natuna weaqina. Ba'e yani magilafudi 'idiega kana tabo waiwai Keliso 'inaya, ta kana veilivu aqiaqi kavona tauna ena ilivu 'idewani.

¹⁴Ba'e 'inega ita'a eda ilivu ge wese gogama edi ilivu 'idewani. Mana lova eda alamani dawalilina 'inaya ve'ita dumadumadi be dumadumadi nidoeda, mana vaidi to'eu'au'ava edi ve'ita nua'ewa'ewana, ta gamonaya

^p 4:2 Kol 3:12-13 ^q 4:3 Kol 3:14-15 ^r 4:6 1Kol 12:6 ^s 4:7 Lom 12:3,6 ^t 4:8 Same 68:18
^u 4:9 Ion 3:13 ^v 4:11 1Kol 12:28 ^w 4:13 Kol 1:28

luveifana 'eno'eno. ^{15 x} Ta 'esi luaqiaqieda be veyolubega vonahaqiaqi kana veqaeeya, 'inega eda ilivu qabuna ina veaqiaqi Keliso ena ilivu 'idewani. Ita'a 'ekalesia Keliso 'wafina, ta tauna 'wafi~nana debana. ¹⁶ Keliso ena nuanua 'inega du'u qabudi walowaloqega iluvetuba aqiaqi. Ta 'eguma du'u 'aidega 'aidega edi fewa iviaviaqi ta iveveiuiula, e 'inega 'wafi~nana qabuna taunega veyolubega tabotabo.

Ilivu 'itu'ituwaina ta vauvauna

^{17 y} 'Inega wese Kaiwabu ana wawega yavona aqiaqiemi, ilivu luveifadi ona lua'udi, ta tomeqabu Yaubada ge ida vetumaqanea edi ilivuyavo ge ona 'abibodedi, mana taudi edi nuanua kavokavovo 'idiega ge taha vuaqa aqiaqina da'ifoqe. ¹⁸ Ta edi nuanua qabudi velovelovanidi, ta gebu Yaubada yawaina 'idia da'eno'eno, mana edi vedeba 'i'wana 'inega ni'au ivekwavakwava. ¹⁹ 'Inegana taudi ge ida alamania tola'ai aqiaqina nage tola'ai luveifana, ta 'esi taudiega ive'ineiedi ilivu bwavubwavuna 'idia. Ta tuta qabuna ilivu luveifadi nuadi 'ewe, ta nuanuadi ilivu diavona ina luvetomanidi.

²⁰ Ta ni'a yahalamania lova ve'ita o'ewe Keliso ena ilivu aqiaqina weaqina, 'inega ge wese ilivu luveifadi ona viaqidi. ²¹ Omi'a yani qabuna leisu weaqina ni'au onoqolia, ta wese oalamani aqiaqiea ge taha u'ava 'inaya da'eno'eno. ^{22 z} 'Inega ilivu luveifana lova oviaqidi ona nogedi, mana omo'e ilivu diavona igiveluveifa otaqimi ta taumiega ou'avemi. ^{23 a} Ta 'esi luaqiaqiemi be emi nuanuayavo ta wese giwalimi ina vevauvau 'evivi. ^{24 b} Ta wese luaqiaqiemi be ona veilivu aqiaqi ta Yaubada ena ilivu ona vetutumedi, mana tauna ena nuanua 'inega ni'a give'evaunimi, ta omi'a 'iva'ava'aimi kavona tauna 'idewani. 'Inega ona vetunutunuqa be ona vevunavunaqa ta wese tuta qabuna vonahaqiaqi 'awamiega na'ifo'ifoqe.

Toa vauvauna ta aqiaqina

^{25 c} 'Inega 'eu'au'ava ona nogei ta 'esi ma emiavo ona vonahaqiaqi taumiega nuanimia, mana ita'a qabuda Keliso 'wafina du'unavo. ^{26 d} Ta 'eguma diami navilea ge ona awafelemi ilivu luveifana 'inaya, ta 'esi ami diavilavila ona givetunuqia, ta 'abiboda ona 'eno, ²⁷ mana diavilavila~nana 'inega Seitani ana fata navetoluvine 'imia. ²⁸ Ta tovanawalayavo ina lua'u vanawala! Ta 'esi fewa aqiaqidi nimadiega ina viaqidi, ta fewa diavona adi ve'ia 'idiega tovelukwalukwa ina iuledi. ^{29 e} Ta ge wese sofamiega vona luveifadi ona 'inamedi, ta 'esi

^x 4:15-16 Kol 1:18; 2:19 ^y 4:17 1Fit 4:3; Lom 1:21 ^z 4:22 Lom 8:13; Kol 3:9

^a 4:23 Lom 12:2 ^b 4:24 Nug 1:26; Kol 3:10 ^c 4:25 Kol 3:8-9; Sek 8:16 ^d 4:26 Same 4:4; Iem 1:19-20 ^e 4:29 Kol 4:6

vonahaqiaqi otaqina tomotau adi givewaiwai weaqina ona vonayedi, be yaqisa emi vonayavo ina ve'ebeiula tovineneqa 'idia. ^{30f} Ta ge Niboana Gwalagwalana ona givenuavitei emi ilivu 'inega, mana tauna ami 'ebe'inana. Ta nawale taunana 'inega Yaubada na'etoyavuida tuta 'ebeluv'ova 'inaya. ^{31s} 'Inega nualuveifa be, diavilavila be, gamohoqala be, vetalafululu be, ve'ae'aetoga, ta wese ilivu luveifana qabudi ona nogedi. ^{32h} Ta 'esi taumiega ma emiavo ona veyolubemi nuakolokoloyega, ta tomotau 'ekalesia gamonaya edi luveifana ona nuataqodi, 'edewana Yaubada emi luveifayavo Keliso 'inega ni'au nuataqodi.

Toa simasimalatina

5 ¹ⁱ Yaubada ena veyolubega ni'a 'awanatuna aqiaqiemi, 'inega ena ilivu ona vetutumea. ^{2j} Ta taumiega ona veyolubemi 'edewana Keliso veyoluba 'aiqeda tuta~nana yawaina awafelea, ta taunega vegubayea Yaubada 'inaya weaqida. Ba'e veguba~nana kavona egaga taha meilana aqiaqi otaqina, ta Yaubada nuana 'onea.

³ 'Inega ilivu luveifana 'idewani velamo'eno kavokavovo be, vemanuguba ta wese yubai edi ilivu 'idewani ge ona viaqidi, mana ilivu diavona ge taha wese Yaubada ena tomotauyavo daluaqiaqiedi. ⁴ Ta ge wese ona tuyeqa nage ona vona kavokavovo, nage ona ve'awafaifaila, mana vona diavona gebu daluaqiaqiemi. Ta 'esi emi vonega ona lukaiwa Yaubada 'inaya. ^{5k} Yavona aqiaqiemi, tovelamo'eno kavokavovo be taudi edi ilivu kavona yubai 'idewani ta wese tovelamanuguba ge adi fata ina lugu Keliso be Yaubada edi 'Ebeluvine 'inaya. (Vonahaqiaqi, tovelamanuguba ge taha tuta Yaubada dahawatuboi, ta 'esi yani qabuna 'inaya 'eno'eno 'idia iwaiwa'odu.)

Simatala weaqina

^{6l} Ta wese 'eguma taha toga ba'e ilivu diavona weaqidi nau'avemi navonemia, "Ami fata ona viaqidi." e 'inega vona diavona ge ona vetumaqanedi, mana nawale ilivu diavona adi toviaqayavo Yaubada ana diavilavila ina lobeia. ⁷ 'Inegana tou'ava diavona edi viaqayavo ge wese ona viaqidi. ^{8m} Omi'a lova velovelovana 'inaya otoatoa, ta ba'itagana ni'au ovaukamana Yaubada ena simatala 'inaya, e 'inega emi ilivu 'idiega tomotau ona ve'itayedi simatala 'inaya otoatoa. ⁹ Mana ilivu aqiaqidi be tunutunuqidi ta wese vonahaqiaqi i'ifo'ifoqe simatala~nana 'inega. ¹⁰ Ta wese ona sali aqiaqi be yaqisa eda Kaiwabu ena nuanua ona alamani aqiaqiea, ta wese ona viaqia. ¹¹ Velovelovana ana viaqia

^f 4:30 Ais 63:10; 1Te 5:19; Efe 1:13-14 ^s 4:31 Kol 3:8 ^h 4:32 Md 6:14; 18:22-35;

Kol 3:12-13 ⁱ 5:1 Md 5:48 ^j 5:2 Ibe 10:10; 'Ifo 29:18 ^k 5:5 1Kol 6:9-10; Kol 3:5

^l 5:6 Kol 2:4,8; Lom 1:18 ^m 5:8 Efe 2:13; Kol 1:13; 1Fit 2:9; Ion 12:36

kavokavovo ge taha wese 'idiega ona viaqidi, ta 'esi ona simana 'ifoqeyedi 'atamanaya. ¹² Tomeqabu Yaubada ge ida vetumaqanea ba'e ilivu diavona 'ebeiniyauyau iviaviaqidi. Ta ita'a tovetumaqana 'eguma ilivu diavona kana veqayedi ada lutonova ge aqiaqina, ta 'esi kana iniyauyau. ¹³ ⁿ Ta 'eguma simatala~nana ilivu diavona guguvesimalididi, e 'inega ada fata edi luveifana kana alamani aqiaqiedi, ¹⁴ ^o mana 'eguma simatala~nana ilivu luveifana naguvesimalalia, 'inega luveifa~nana ge ana fata naoukwaiva, ta 'esi simatala~nana 'inega kana 'ita aqiaqiea. Ba'e 'iuna 'inega Buki Nugwenugweina vonaya,

“O'a to'eno motaiva u'enovila!

'Aligega uya'itoto,

ta Keliso naguvesimalaliu.”

¹⁵ ^p 'Inega emi ilivu ona 'itamaki aqiaqiedi, ta taudi ge edi nua'eqa'umo edi ilivu ge ona 'abibodedi, ta 'esi taudi tonua'eqa'u aqiaqi ona 'abibodedi. ¹⁶ Ta 'eguma tuta aqiaqina ona lu'awaiea viaqa aqiaqina weaqina, e 'inega yani~nana ona viaqia, mana ba'itagana tuta luveifana 'inaya katoatoa. ¹⁷ 'Inega gebu ona vekwawakwawa, ta 'esi eda Kaiwabu ena nuanua weaqimi ona alamani aqiaqiea.

¹⁸ ^q Ta go'ila waiwaina ge ona numa 'oda'odaqa, mana bena'e yani 'ebeveilaqe, ta 'esi ona awafelemi Niboana Gwalagwalana 'inaya ta tauna naluveagatuna'imi be wese na'abiluvini. ¹⁹ ^r 'Inega ma emiavo ona 'evosi Buki Same 'inega be, Buki 'Evosi 'inega ta wese 'evosi vauvaudi tafwalolo weaqina 'idiega, ta ma emi qaiawa giwalimiega ona 'evosi eda Kaiwabu 'inaya. ²⁰ ^s Ta tuta qabuna Yaubada Tamada 'inaya ona lukaiwa yani qabuna weaqidi eda Kaiwabu Iesu Keliso ana wawega.

Vaqivaqidi adi luvine

²¹ ^t Ta omi'a vaqivaqimi ona veawahawafelayemi ma moqanemiavo nuanimia, ta ba'e 'inega emi 'amayaba ona ve'itaye eda Kaiwabu 'inaya.

²² ^u Omi'a vivine vaqivaqimi ona awafelemi moqanemiavo 'idia kavona emi awafela Keliso 'inaya 'idewani ²³ ^v mana 'oloto tauna moqanena debadi, 'idewani Keliso tauna 'ekalesia debana, ta 'ekalesia tauna Keliso 'wafina, ta Keliso tauna 'ekalesia ana To'etoyavua. ²⁴ Ta ita'a to'ekalesiayavo kahawafeleda Keliso 'inaya, e 'inega wese 'edewanina vivine ina awafeledi moqanediavo 'idia.

²⁵ ^w Ta omi'a vaqivaqimi me'olotomi moqanemiavo ona veyolubedi, 'edewana Keliso ena 'ekalesia veyoluba aqiaqiea, ta weaqina awafela 'aliga 'inaya. ²⁶ ^x Tauna 'ekalesia~nana givegwalea be givevunavunaqia

ⁿ 5:13 Ion 3:20-21 ^o 5:14 Ais 26:19; Lom 13:11 ^p 5:15-16 Kol 4:5 ^q 5:18 Lk 21:34

^r 5:19 Kol 3:16 ^s 5:20 Kol 3:17 ^t 5:21 1Fit 5:5 ^u 5:22 Kol 3:18; 1Fit 3:1

^v 5:23 1Kol 11:3; Efe 1:22; 4:15 ^w 5:25 Kol 3:19; 1Fit 3:7 ^x 5:26 Tai 3:5

babitaiso be wese Yaubada ena vona 'idiega. ²⁷ Ba'e yani~nana Keliso viaqia, mana nuanuana ena qabuyavo to'ekalesia nawale na'iteda ge bwavubwavuda ta ge wese yani luveifana 'idaya, ta 'esi vunavunaqida be gwalagwalada, ta wese ge taha ada 'ebeve'ewamo. ²⁸ Ta wese 'idewana ita'a me'olotoda luaqiaqieda be moqanedavo kana veyolubedi 'edewana tauda 'wafida kaveyolubea. Mana 'eguma taha 'oloto moqanena veveyolubedi, e 'inega wese taunega veveyolubea. ²⁹ Mana ge taha toga taunega 'wafina davevoalanea, ta 'esi tuta qabuna 'ita'itamakia ta veve'ainia ana iula weaqina. Ta wese 'edewana Keliso ita'a to'ekalesiayavo tuta qabuna 'ita'itamakida, ³⁰ mana ita'a tauna 'wafina du'unavo. ³¹ ^z "Ba'e 'iuna 'inega 'oloto tamana be inana nanogedi, ta 'esi moqanena maega ina luvetuba, 'inega magilafudi ina ve'wafi 'aidega." ³² ^a Egu vona ba'e kavona vona sesebai 'wai'waivina, ta vona~nana ana alamani Keliso be wese ita'a to'ekalesiayavo weaqida yavonavona. ³³ Inega wese yavona 'eviviami, omi'a 'oloto moqanemiavo ona veyolubedi 'idewani taumiega oveveyolubemi, ta omi'a vivine moqanemiavo ona 'amayabedi.

Ina be tama ta wese gogama adi luvine

6 ¹ ^b Omi'a gogama, inamiavo ta tamamiavo ona matayagedi, mana Kaiwabu ena nuanua 'idewani. Ba'e ilivu~nana luaqiaqiem i be ona viaqia. ² ^c Buki Nugwenugweina simana vonaya, "Tamau ta inau una 'amayabedi." Ba'e luvine vefaibina Yaubada ena luvineavo teni 'idiega. Ta luvine~nana gamonaya vona fofofola taha 'eno'eno ana tomatayaga weaqidi. ³ Ta vona fofofola~nana ana noqola ba'e 'idewani: 'Eguma tamau be inau una 'amayabedi, "inega me eu qaiawa tuta kuena una toa bwa'obwa'oya."

⁴ ^d Ta wese omi'a tama yavonevonemi, emi ilivu 'inega natumiavo ge ona vediavileviledi. Ta 'esi edi ve'ena'i nuaninaya eda Kaiwabu ena luvineavo ta ena nuanuayavo ona ve'itedi.

Kaiwabu ta tofewa kavovo adi luvine

⁵ ^e Omi'a tofewa kavovo emi kaiwabuyavo bwa'obwa'oya ona 'amayabedi, ta me emi gwavubiga edi nuanua ona viaqia, kavona Keliso weaqina oda fewafewa. ⁶ Tuta qabuna ona vetafe'wa waiwai emi kaiwabuyavo weaqidi. Ge taha tola'ai 'eguma ivevekovemi, nage ge ida vevekovemi, ta tua tuta qabuna me emi gwavubiga ona vetafe'wa 'idia, mana ba'e Yaubada ena nuanua. ⁷ Ta wese me emi qaiawa aqiaqi ona fewa 'idia, kavonaya Keliso weaqina oda fewafewa ta ge tomotau weaqidi. ⁸ ^f

^y 5:27 2Kol 11:2; Kol 1:22 ^z 5:31 Nug 2:24; Md 19:5 ^a 5:32 Ve 19:7 ^b 6:1 Kol 3:20

^c 6:2-3 Luve 5:16 ^d 6:4 Kol 3:21; Same 78:4; Vos 22:6 ^e 6:5 Kol 3:22-23; Tai 2:9-10;

1Fit 2:18 ^f 6:8 2Kol 5:10; Kol 3:24-25

Ona nuave'avinia nawale eda Kaiwabu 'inega tomotau 'aidega 'aidega, taudi tofewa kavovo ta wese taudi yavuyavuidi adi ve'ia ina 'ewea edi fewa aqiaqidi 'idiega.

⁹ Ta omi'a kaiwabuyavo emi tofewa kavovo ona veilivu aqiaqiedi, ta gebu ona awavedidigedi. Ta ge ona nuafania vonigo omi'a be wese emi tofewayavo qabumi emi Kaiwabu mahalaya toatoa, ta tauna tomotau qabuda luvine 'aideganega luluvineda.

Yaubada ena kulufa 'ebevedavi weaqina

¹⁰ Egwavo, egu ve'ita ana 'ebelu'ovoa ba'e: Eda Kaiwabu ena waiwai qiduna 'inega ona vewaiwai. ¹¹ Ta Yaubada ena kulufa 'ebevedavi qabudi ona veaqedi be yaqisa tuta qabuna ami fata ona tovoloi'ita Seitani ena u'avayavo 'idiega. ¹² Mana eda vedavi gebu tomotau otaqa maega, ta 'esi tolumine luveifadi be, tovewaiwai be, yani qabudi bwa'obwa'o velovelovaninaya itoatoa maega, ta wese bwa'obwa'o be mahala nuaninaya ana niboanayavo luveifadi maega kavevedavi. ¹³ Ba'e 'iuna 'inega Yaubada ena 'ebevedavi qabuna ona veaqedi be yaqisa tuta luveifana 'inaya Seitani ge ana fata navunuqimi, ta vedavi~nana 'abibodanaya nawale me emi waiwai ona tovoloi'ita.

¹⁴ 'Inega ona 'iva'ava'aimi ta vonahaqiaqi 'inega ona vegadi'wana, ta lumalumami ona 'aubodebodedi ilivu tunutunuqina 'inega. ¹⁵ Ta ami 'aqeyafayafa Vale Aqiaqina daumwalina ona veaqea, be yaqisa me emi 'iva'ava'ata ona tovoloi Vale~nana ana yawala dadana weaqina. ¹⁶ Ta wese emi vetumaqana ona ve'etonugwetea tauna emi 'ebevebaba be yaqisa Seitani ena gita so'uso'udi nalutuhuyedi ta na'ebaidi 'inega ge ana fata ina 'idawemi. ¹⁷ Ta 'etoyavua 'inega debami ona 'aubwaea, ta wese Niboana Gwalagwalana ena kefata ona 'ewea, e bena'e Yaubada ena vona. ¹⁸ Tuta qabuna Niboana Gwalagwalana ena iula 'inega ona venoqi ba'e yani diavona weaqidi. Ta ge matami nadune, ta 'esi taumi ma emiavo ona 'itamakimi. Ta me emi bibitaqo ge ona lua'u venoqi tovetumaqana qabudi weaqidi. ¹⁹ Ta wese ya'a weaqigu ona venoqi, be yaqisa me egu giwalifatu Vale Aqiaqina ana alamani 'wai'waivina agu fata ena vona 'ifoqeyea. ²⁰ Ba'e Vale~nana weaqina vanue 'ebeyoqona 'inaya ia'uluguyegu. 'Inega ona venoqi Yaubada 'inaya, be yaqisa ge ena mwaniniva tuta~nana Vale~nana ena simana 'ifoqeyea, mana ba'e agu veyoveyoya.

⁹ 6:9 Kol 4:1; Lom 2:11 ^h 6:11 Lom 13:12; 2Kol 10:4 ⁱ 6:12 1Fit 5:8-9 ^j 6:14 Ais 11:5; 59:17; 1Te 5:8 ^k 6:15 Lom 10:15 ^l 6:17 Ibe 4:12 ^m 6:18 Lk 18:1; Kol 4:2; 1Te 5:17
ⁿ 6:19 Kol 4:3-4; 2Te 3:1 ^o 6:20 2Kol 5:20; Fim 9

Faulo ena lukafoi

²¹ ^P Ta Tikiosi yavevetunea 'imia, be yaqisa yani qabuna ona alamania ya'a egu toa weaqina ta wese tola'ai yaviaviaqia. Tauna ia otaqigu, ta wese eda Kaiwabu ena tofewa gwavubiga 'avana. ²² Ta egu vetune 'iuna mana nuanuagu ona alamani aqiaqiea ma'oda atoatoa 'aiqa, ta wese Tikiosi ena vona iula 'inaga nagivewaiwaiemi.

²³ Egwavo, egu nuanua Yaubada Tamada be wese eda Kaiwabu Ieisu Keliso edi nuadaumwala be veyoluba vetumaqana maega omi'a to'ekalesia 'imia. ²⁴ Ta wese nuanuagu Yaubada ena nuakolokolo nawebui omi'a tomeqabu eda Kaiwabu Ieisu Keliso tuta qabuna oveveyolubea 'imia, ta veyoluba~nana gebu ena awalamo.

^P 6:21 Via 20:4; Kol 4:7-8; 2Tim 4:12